

楊文弱先生集

楊文弱先生集卷之三十五

明 武陵楊嗣昌文弱著

山梓

農基

孤兒山松同輯

孫

農耆

同較

山櫟

農正

疏

君恩曠世難逢臣罪沒齒無怨疏

時以東閣大學士禮部尚書兼兵部

尚書賜尚方劍督師剿賊以下同

崇禎十二年八月二十四日准吏部咨該臣奏爲部務有

托臣罪難延懇祈聖裁立加斧鉞事奉聖旨卿洪猷忠悃
政本攸資昨諭旨已明何乃復有此請著祇遵回閣佐理
副朕眷荷不必引陳該部知道欽此欽遵備咨到臣伏讀
溫綸不勝悚息隨恭設香案望闕叩頭暫時申謝外竊念
臣愚積罪有若丘山臣積請罪之心有同金石祇以未解
部務強延日時每一念起毛髮爲豎屢蒙皇上回閣佐理
之命臣實廩不敢承一並寂不敢言也幸今部務有托候
代已完臣之一心祇知丘山之罪必不可追金石之請必
不敢渝皇上試問中樞安攘寡效賜之殊宥臣視如歸萬
一垂憐狗馬投畀瘴鄉稍存假息是則天高地厚曠世難

逢而臣祇戴新恩沒齒無怨者也若夫綸扉重地濟濟多
賢無容罪臣廁貽瑕玷臣披心瀝請無敢飾辭伏惟聖慈
俯垂鑒允

崇禎十二年八月二十五日奉聖旨五案失事重大樞
輔嗣昌雖調度勞苦倍嘗亦不得不爲法受罰前已經
革職戴罪辦事後因敘功准復而輔臣屢疏請罪誠懇
愈加尤見守法振玩至意日今叛寇猖獗總理革任以
輔臣才識過人辨此裕如可星馳往代速盪妖氛抹民
水火凱旋之日優敘隆酬仍賜尚方劍督師各省兵馬
自督撫鎮以下俱聽節制副參以下卽以賜劍從事其
勅印等項速與辦給該衙門知道

微臣引罪蒙恩廩荷督師重委疏

崇禎十二年八月二十七日臣接邸報該臣奏爲君恩曠
世難逢臣罪沒齒無怨等事奉聖旨五案失事重大輔樞

嗣昌雖調度勞苦備嘗亦不得不爲法受罰前已經革職戴罪辦事後因敘功准復而輔臣屢疏請罪誠懇愈加尤見守法振玩至意今叛寇猖獗總理革任以輔臣才識過人辦此裕如可星馳往代速盪妖氛拯民水火凱旋之日優敘隆辭仍賜尙方劍督師各省兵馬自督撫鎮以下俱聽節制副叅以下卽以賜劍從事其勅印等項速與辦給該衙門知道欽此欽遵抄傳到臣臣聞命自天不勝感戴不勝悚懼除報名廷謝外竊念臣本庸材蒙恩破格受任中樞之日首陳次第功夫必安內方可攘外必足食然後足兵必保民方能盪寇柰圖之二年內未及安外紅旋

援師撤調撫局牢籠迄不免於猖獗皆臣罪也臣方申請
前罪豈期重荷新恩委任督師寧屬庸材可辦惟是仰體
聖懷速盪妖氛拯民水火東西南北臣誼難辭擬於數日
內恭領勅書卽便星馳前去所有緊關要務臣當面請聖
裁然不敢不畧開款件以便批發該衙門奉以從事也臣
計賊在房竹驚伏已久今剿兵挫敗勢必鴟張走秦走蜀
皆不必然之算徑走中原突犯汝蔡蘄黃安廬等處乃必
然之算也此一帶申嚴城守收斂秋禾扼堵要害預先沮
破長驅之計爲第一要務乞勅兵部飛檄嚴行各該撫按
嚴飭道府有司及將領之主守者專任此責又計一向剿

兵堪用首推左良玉一枝次卽羅岱猶稱勇往今羅岱覆沒良玉推殘未得全報確報見兵知能幾何所恃禁旅邊兵養其全力臣至鼓而用之然爲數不多此時不敢增調第前此已調未發之遼兵二千可催發也此亦目前第一要務乞勅兵部馬上催行如秋防無事再調一二千幫助尤爲得力已調在彼禁旅邊兵萬萬無輕撤回徒勞奔走反張賊勢又計賊在房竹是川湖河陝四省中央正堪合剿但入山運糧不易四省期會不齊致令賊逸我勞賊飽我饑賊合我分所以饋事今覆轍在前恐難再蹈則必有致賊而不致於賊之方饑賊勞賊而成其坐困之術臣到

彼講求權難預設然而臣到之時已入冬令雪凍山寒欲如部議定限十二月成功萬萬不能臣愚不敢苟且漫應也此寬限又一要務乞勅兵部毋拘時日但責成功又計今年勦餉全派甚遲此時催徵又加練餉未能如期應手部議新分三督必各各分餉與之而賊在郎襄湖廣河南主客經過絡繹用餉必陪於淮陝二督乞勅戶部轉行督餉侍郎查淮陝二督所轄撫鎮兵力不多酌量發餉必倍湖廣河南寧使有餘毋以艱難之物用於不急之地此又一要務也又計真正流賊首惡無多年來所到地方裹去窮民無數枉遭殺戮難見太平全是州縣有司不得其人

之故乞勅吏部於有流賊省分加意用人如係已經殘破尤煩衆卿親自遴選科甲長材毋以不堪老貢及降調閒散之官塞責其撫道必要知兵府正尤資保障苟非其人臣當不避嫌怨立請易之仰祈聖明恕臣專擅之罪臣聞命倉皇草奏未盡欲量請功賞選帶將材量給馬匹款項尤多伏望聖恩賜臣面見並召吏戶兵部一同商確奏請聖裁施行

崇禎十二年八月二十八日奉聖旨覽卿奏懷懼督師朕心嘉悅所奏各款有神兵機依議行內限期不必預請年來督撫任用非人養寇通賄以致撫不成撫剿不成剿遺禍流毒殊可痛恨卿沉謀勝算著恪遵勅旨嚴督文武各官協謀夾殲解散安插速奏蕩平副朕委任至意凡人材兵餉等事著吏戶兵等部有呼必應共圖

成功其賞功牌銀段絹再命禁兵隨行俱有旨了應奏
疏揭仍在會極門上進該衙門知道

申明剿餉請旨遵行疏

臣昨奏剿餉練餉當相乘除誠恐徵解不前必至兩誤蒙
皇上面諭剿餉自剿餉練餉自練餉頭緒原各分明若再
有更張恐觀望遲滯欽此此誠非愚慮所及也但戶部前
因缺餉議將剿餉一半畱用一半解至京中奉有欽依行
去其後因派練餉四百餘萬又派補缺額餉一百餘萬且
特遣科臣守催則解京之餉自有餘裕不宜復分剿餉明
矣臣今奉命督師所需剿餉全給使各處士飽馬騰剿賊
賊不敢不力謹再疏申明乞勅戶部勿分剿餉仍責督餉

侍郎斟酌量發淮陝倍發楚豫如臣前疏所稱湖廣河南
主客經過絡繹寧使有餘乃盪賊第一要務萬萬不容有
誤者也謹祈聖鑒再勅遵行

崇禎十二年八月二十九日題○山松曰玩先人此疏
蓋言前者戶部議將剿餉一半解京今既派練餉又派
補缺額之銀則可以抵剿餉解京之數而剿餉當全用
之剿賊矣非並練餉而請作剿賊之用語氣自明而吳
梅村殺寇紀畧乃云合剿與練二餉爲一用何其悖也

軍前需餉甚急乞勅督臣就近料理疏

竊照目今賊勢與從前散漫各省稍稍不同督餉侍郎遠
駐池州離楚豫用兵之地水陸二三千里轉輸不便接濟
甚難以致主客官兵往來州縣閉門不應誤擾多端沿村

打糧無異賊害皆此故也臣愚今奉嚴命刻期勒兵合議
聖裁立勅督餉侍郎張伯鯨移近楚豫用兵之地源源輸
輸親歷州縣用兵之所多方調劑使兵至不憂無餉有討
不致閉門則整肅軍紀無敢驛騷捄民窮不遭深熱在
此行矣其池州駐處委令分司再行撥運諒自非難若侍
郎不親歷楚豫而以分司代行萬萬無濟臣不敢不臆言
也懇祈聖鑒速飭施行

崇禎十二年九月初三日題

微臣受命遠行敬陳愚悃疏

竊照臣至不材荷蒙聖恩授以督師重任星馳就道漸遠

天顏犬馬之私不勝依戀念我皇上仁覆區宇一紀於茲
天人理欲貫虞廷精一之心宵旰憂勤出周王無逸之治
宜乎四海之內悉臻郅隆然而邊警外訌寇盜中蔓未遽
剿平則以下土臣民作孽太過仰干天地恫我祖宗降茲
刳殺威不起於我皇上臨御之日也今理極數窮剝盡當
復實維中興聖主重開景運之一時以臣不材勉膺新命
加錫銀幣服色以寵其行特頒輔臣印劍以重其事賞功
分御前之賜隨行資禁旅之雄歷稽遣將出師從未聞此
曠典臣飲冰日夕凜凜憂思夫豈臣之驚鈍果堪稱此任
哉惟我皇上五夜焦勞一心求治救民水火堯舜其咨

天地祖宗寶式鑒臨未有下土之孽不自是而除刼殺之災不自是而轉者也向來文武諸臣地處疎逖末繇覩至尊之面曷能窺至尊之心臣則忝備樞近對揚耿光或侍文華武英或趨平臺煖閣親見聖人霽顏清問動色疇咨念念皆採民水火之心事事皆採民水火之治惟恐奉行不善體恤難周以採民者害民如水深而火熱此不特州縣令長所未聞而抑恐督撫大吏知之未盡臣今邇徃惟有宣布皇仁採民水火四字使督撫以下無人不仰見天心卽人人如在水火之中人人自作拯採之事而盜賊不難平矣其行間剿撫臣藉諸臣同心共濟臨期調度未敢

預言惟臣犬馬遠離闕廷實深依戀我皇上穆清端拱志氣如神喜起明良時幾必勅臣無尺寸可以仰裨惟有臣父先臣鶴曾事皇上初年以愛惜人材培養元氣之說進臣愚推而演之於聽言詢謀試功舉獻實臻唐虞風動之休用敢重陳黼座少畱聖心是則犬馬下情不忍以遠行而自外者也至黃道周范景文成勇劉同升趙士春懲創既久開恩賜環或亦天心解網之候此又臣所望而不敢必者也

崇禎十二年九月初二日題

恭謝天恩殊常寵錫疏

崇禎十二年九月初四日恭遇我皇上臨御平臺召臣
昌隨同官臣薛國觀臣蔡國用臣范復粹臣姚明恭臣張
四知臣魏照乘面見臣嗣昌稽首頓首恭謝我皇上銀幣
服色之賜方起於地復蒙皇上賜臣龍箋一幅異香襲人
臣等恭同展觀乃知御製詩章親灑宸翰特爲臣督師之
行俯加訓勉而作者臣等諷詠不遑拜舞相續聽虞歌之
喜起躬際重華承說命之交修神希舊學顧流言之未靖
難辭雨雪東山佇王化之已行奚直泳遊南紀斯吾皇之
盛治臣等不敢不勉旃者也若夫金聲玉振嗣音三代之
前鐵畫銀鈎專美百王之上似吾皇之餘事幸臣等之奇

逢惟臣嗣昌才遜中人學慚上達棗酸梨酢寧堪調鼎之
資蔚瘁蒿勞詎任干城之寄是以惕中自訟懲前從事之
無成豈知與命重申卜後武人之利進挈隆撓於本末臣
當自比枯楊決濟罔於愛威帝則追稱細柳臣誠不敏竊
亦有聞貞吉丈人之師能以剛中而應行險而順用行夫
子之志必也臨事而懼好謀而成惟臣翼翼之小心欽承
一命再命而僣僕奉帝桓桓之勝畧恭行六伐七伐而止
齊如能使赤子之弄潢池一朝盡買牛犢不異挽銀河而
洗金甲萬里無聞鼓鼙斯則宗社之靈吾皇之福非臣愚
所自必也教養以遂民生願慙吾皇本志禮樂以俟君子

亦豈臣愚敢知臣祇奉天章珍藏世寶不勝歡忭舞蹈之至謹具奏謝以聞

崇禎十二年九月初四日題

軍情疏

臣於本月初六日面辭領勅出宣武門遇總兵左良玉差人投遞塘報猶是前七月二十六日入山情形未知與熊文燦所報有無同異然其自言先畱坐營張應元督領標下官兵二千一百員名駐防南漳係未入山之數又言羅岱亦將騎兵盡畱光化其步兵飢不能前止率親隨數十人一同滇營臨陣則此二枝兵馬雖遭挫衄似猶堪以整

理而各賊戰畢潛夜仍向竹山遠遁似猶未遽衝突也午
後行過盧溝橋復遇太監劉元斌差人投書內云八月初
七日抵襄陽探報張賊西去已遠左兵俱已出山又兼大
雨連綿平地水深數尺是以未便輕進情形亦覺同前惟
云龍在田久奉回滇之旨今仍在襄不便與總理議措行
糧遣發又云欲以兵加老猢猻等三營臣思今日逆惡張
賊爲首一向奸狡張賊爲甚似難舍之而先問其餘且張
賊雖云西去未有入秦入蜀之報是猶在房竹之間馬兵
難以入深步兵不宜輕棄臣憂今日兵少不患兵多欲盡
追發滇兵似亦未易言也據元斌之議亦欲商之於臣但

不知臣已起身在途到彼面商更便其書中云有密奏五款臣未之見其書或亦其奏內之兩端伏望聖明裁擇批示臣等再加詳酌施行

崇禎十二年九月初六日題

軍務疏

竊臣頃奉督師之命僅六日而成行所有調將允馬等事未及詳奏今查總理熊文燦標下未有中軍臣調原任建寧副總兵陳可立擬充是選本官乃薊督洪承疇先題練兵出建寧之缺山撫題補黃蜚今兵仍就邊訓練而本官空閑臣咨薊督許臣而後調之又遊擊劉登科該督新題

臣竊房無大過臣聞其有家丁百人因與可立后謀逆言
兵部勘合戶部糧單去訖其在宣府有守備党士傑王進
忠李滿桂三員不用勘合糧單臣僅以火牌咨送宣督陳
新甲轉調去訖又昌鎮都司劉永昌南協守備宋奎堯皆
臣在山海時所用衝鋒之士已擬咨兵部調用因在興陵
近地先請旨而後敢行其太僕寺俵馬臣咨部用一百匹
昨僅選得七十九匹尙該二十一匹擬咨兵部候陳可立
前來調補給之凡此皆前奏已言而未盡者也馬匹欲索
長卑沿途關支料草猶恐紛擾不便臣委官給銀按日自
餒似爲得宜但臣在京三十個月勉強公令自守經

無私財以佐公費昨於兵部庫貯借銀五百兩又預支柴
直至明年春季共二百三十餘兩而後成行今馬匹之外
帶材官家丁及臣與家丁書記不支驛遞廩糧一切自行
買備皆是物也臣家人婢僕不堪携行者俱已覓脚遣去
衣襪行李本自無多惟臣三十個月中集錄奏稿五千九
百餘件又歷官奏咨等稿係千錢糧邊務與刊刻成書及
軍前必用之書俱攜以行遂裝至十有餘箱臣同盛甲等
物共用車二輛運去臣本無盛甲而此行有以盛甲弓箭
馬匹見遺者軍前適用之物臣不敢辭謹具奏上聞不敢
有隱此臣區區之小心也其勘合裁定夫二十名馬十二

匹緣係行軍所需不免稍濫其數統祈聖鑒垂察仍勅兵部將調用各官陳可立等再加覆議未完馬匹續爲補給施行

崇禎十二年九月初六日題○山松曰按此疏咨調標員收拾行李似可不錄然如此細事亦必入告足見先人散恤小心如此久之再具一疏云原載俸薪得隨開員在支領其員役稟餽總理原載月支五百三十七兩今以四百五十兩爲額書吏併加工食家人亦領口糧日支一兩六錢零先恤其利而後可嚴防其弊亦在其內

軍務疏

臣於九月二十二日汴城拜疏卽擬星馳適值巡撫李仙鳳回省與之面商軍務夜漏三下始休二十三日行抵尉

氏二十四日過洧川至許州二十五日至襄城二十六日
至葉縣各值天雨行止一程二十七日過保安至裕州二
二十八過博望至南陽二十九日過林水至新野漏已二
下卽催夫馬夜行五十里次日辰過呂堰申抵襄陽隨詣
公署開讀勅書率文武官屬拜叩成禮是爲十月之朔矣
維時理臣熊文煥監臣劉元斌鎮臣左良玉俱在襄陽撫
臣方孔炤則自當陽鎮臣陳洪範自鄖陽來會各與面商
軍事凡二日而始知其繁除詢度情形另本上聞外竊觀
大河以南省直寇殘日久官民罹害已深宜乎當事者拯
溺拯焚朝不及夕以仰副我皇上憂勤惕厲皇皇求治之

意而殊不盡然卽如臣愚入境馳檄奏聞者先節制宿兵
轉運糧餉二事悶然後應汎焉若辭無有直下承當應手
立做之實而交際繁文則皆不免臣於撫按大吏封卻其
書厲語其使再至必叅乃有無知有司亦具程狀如葉縣
知縣朱新運者臣將其差人緝打一百棍示衆或足稍示
懲儆而縣此以觀積習相沿大家不改始非一人一日之
故也臣旣仰遵功令峻絕私交以後用兵轉餉慢令違期
必然盡法叅處別無回護而臣所過親王封國禮應朝見
率多傳辭免又加臣禮儀臣踧踖無措間有寄之縣庫給
犒官兵或俟賞功取用者緣親王分尊與平交不同然不

敢不具以聞也至臣已抵襄陽距承天密邇禮應恭詣祖陵伍賊情緊急軍務倥偬臣早夜拮据猶虞不給或容稍俟事寧匍匐展敬理合一並奏明伏祈聖鑒施行

崇禎十二年十月二十日奉聖旨卿峻絕私交益徵清慎地方官有怠玩轉餉的卽行叅究朱新運著從重議處該部知道

審察賊情酌定兵計疏

該臣前奉面諭行間調度事宜不及遠來請旨臣謹識天言奉以從事今至襄陽三日訪問山川道里狡賊情形始知一二款會隨具咨劄通行督撫鎮道等官責成遵行去後念我皇上特遣微臣遠來勾當此事亦必欲知賊之情

形若何臣之調度若何是否有當聖心果否堪期成效而臣所與督撫鎮道叮嚀告誡亦惟我皇上之威命奉以施行是雖不敢請旨以蹈諉卸之迹亦不敢不具題知以涉蒙昧之嫌者也計臣咨劄前事內開照得本閫部在京受命之日卽奏賊在房竹驚伏已久走秦走蜀皆不必然之算徑屯中原突犯汝蔡斬黃安廬等處乃必然之算也一路星馳而來惟恐堵兵不密賊已出山則收拾大費心力今連日探報有言賊回竹山哨到房縣者其別路有無哨馬老營確在何處尚未可知然若在竹山則鄖郡均州兩受其衝若在房縣則均州穀城南漳三受其衝卽今分兵

轉餉扼賊之衝惟恐無及而見在兵馬合算主客原不甚
多處處分之爲力愈薄見在糧餉本色買運已自艱難庫
貯折銀更值罄盡此本閣部到襄三日感慨咨嗟食不下
咽者也今不得已畧開防勦次第分合責成之槩於左惟
我督撫鎮將殫力同心共濟機務功成之日本閣部臚列
上聞慶賞優隆天恩不靳如或違悞勅書具在未敢私徇
本閣部初頒軍令必信必行慎毋因循積習陰懷藐玩明
肆抗撓以簡命爲兒戲也 計開 一鄖撫王鰲永鄖襄
用兵皆其專責今宜提督主兵首扼鄖陽要衝總兵陳洪
範副總兵周繼先等該前理院調防金添等灘合行併力

截殺勿容窺渡如賊縣房縣已隔鄖陽該撫鎮卽提兵趨下均州合營倘徑走穀城舊路不縣均州卽又提兵趨下穀城等處隨方截擊仍先撥銳船飛流扼堵免致疎虞

一總兵左良玉援勦重任久著威名今令提所部兵尋扼均州要衝副總兵張一龍係本閣部會商督理調發合營剿殺務收奇捷如賊縣房縣徑走穀城必要偵探明確飛下穀城前來扼擊倘縣房縣另走保康南漳卽要抄尋便道出奇爭先毋於山徑之中轉落賊後致滋遲悞 一湖撫方孔炤荆承重地是其信守一向駐兵荆門適中副將羅安邦駐當陽楊世恩駐宜城分左右翼扼定荆承二略

已爲得策如賊繇南漳間走宜城一面合營拒堵一面知會承天守將錢中選發兵策應毋得疎虞 一偏撫陳蔭謨部調駐兵荊州固護惠藩重地兼沮狡賊南渡之謀今賊若繇南漳間走建陽或繇房竹間走興山皆可至荊州之境該撫務須堅壁無示賊瑕一面先調署道馮上賓駐彝陵要害調施州衛兵極力拒守本閫部將合鄖襄主客之兵卷甲而入再檄川兵衝殺而出是盡賊之一期也 一川撫邵捷春嚴堵川東已有專責今賊若離房竹間走興山卽上彝陵歸州徑闖夔門一路夔門原是天險無奈人心不固聞風破膽最易驚逃必須大舉精兵預出夔門

以外阻絕要衝斯可萬全無患若賊犯荊州前阻江湖後
離險隘不歿何之該撫但提銳士五千水陸來會足當十
萬之用萬萬不可失此機會也 一河撫李仙風轄屬南
界緊接鄖襄今須躬駐鄖州轉運糧餉督該撫鎮精銳之
兵分防槐樹關羊皮灘等處毋容一賊窺渡致滋蔓延
一陝撫丁啓睿轄屬興商俱接鄖界前久駐兵興安嚴防
白土已著勞能今宜取道山中駐兵商雒南可以斷鄖西
上津入山陽之路東可以塞內鄉盧氏逼關陝之門其總
督鄭崇儉偵賊遠離竹房不能復返卽當度兵于午直出
潼關以應中原會剿之若不容更待咨調者也 一勇衛

京兵見有總兵孫應元駐劄襄陽總兵黃得功駐防光化其副總兵張一龍調往荊州周過吉暫駐新野相距咫尺呼吸可通又有叅將張琦等及大同副將刁明忠追剿猓革亦將調回惟俟賊勢少定決其所之本閣部會同督理星馳電擊機難預言其本閣部標下原無多兵卽以京外主客之兵爲兵亦無別將卽以舊屬新歸之將爲將惟我督撫鎮道努力同心共建旂常之績仰抒當宁之憂是則本閣部碌碌無能因人成事之所厚望也

崇禎十二年十月二十日奉聖旨奏內防剿分合責成督撫鎮道方畧具見卿調度知道了該部知道

交代兵馬疏

該臣於十月初三日接得原任總理臣熊文燦交代兵馬冊一本內開官兵丁健一萬五千八百二十二員名馬廐七千三百七十五匹頭以爲總理標下之兵有如此數亦足展布無難也及細查之內爲總兵左良玉原統三千二十一員名總兵陳洪範原統二千三百三十八員名二項共合五千有奇之數次則副將劉國能遊擊劉世傑共統二千二百四十六員名遊擊馬進忠都司馬士秀守備杜應金共統八百四十三員名加銜叅將李萬慶統領三百三十三員名三項共合六千有奇之數其實在總理標下者四千三百四十三員名而已內中尙有一百九十

名爲軍牢雜役之數又有一千三百六十四名爲龍在田
遺下川貴兵新收選用之數除此二項則實在兵不滿二
千八百餘名而有官馬一百四十餘匹耳理臣馳驅二載
僅此標兵何其甚薄欲使風行大帥草偃行人何其甚難
理臣不以爲薄且難而安之如故是以二年所就惟有剿
撫之勞未收剿撫之局坐是故也臣今接管交代非敢時
詘舉羸別求增調但願將見在大同之兵與續調遼東之
兵姑准暫作臣標而勇衛京營之兵自成一股重勢彈壓
消弭所資不_少伏望皇上如臣面請勿輕撤回則事定功
成或庶乎其可必臣非欲擁標自衛固將有所用之也伏

惟聖慈垂察俯允施行

崇禎十二年十月二十日奉聖旨知道丁遠兵著遵旨速發並

大同見在兵馬俱聽督師輔臣便宜調度該部知道

交代錢糧疏

臣於十月初三日接得理臣熊文燦交代錢糧冊一本內除舊管新收開除項下應聽達部查銷外其實在項下開有十年分未解到剿餉一萬三百九十三兩十一年分未解到剿餉二十四萬一千七百二十兩有奇十二年分全未解到剿餉三十五萬一千兩是三年剿餉共尙存銀六十萬三千一百一十三兩雖非實在之數却是應收之數亦可作爲實在者兩載苦心多方節省俱在此冊中云云

臣閱之不勝嘆息理臣用兵今至十二年之十月矣而十年十一年剿餉尚有未完十二年分文未解節省苦心固自可掬然而督解之遲抑何若是甚也果地方未徵乎抑徵之而別用乎抑未用而塵封於彼乎三者殊未可解臣在部時見鄖撫屢告缺餉卽創建一議以理餉之有餘補撫餉之不足於中甚可通融及奉旨施行理臣亦自以爲通融矣而鄖撫終以爲未然時形奏牘殊多憤激臣不曉其故乃今而知全未解也臣尙未查詳細不知不解之責在督餉侍郎抑或在省直道府但目今鄖襄聚兵剿賊需餉甚殷卽禁旅行鹽日費一千五百金亦積欠如許而襄

庫洗空無分文可發臣從汴梁帶到賞功四千餘兩亦那
三千以給左陳二鎮之兵發往郎均而去則事急可知矣
督餉侍郎張伯鯨新題移鎮未聞起程之期固自可諒乃
分司王楊基原當轉餉於楚者亦不揣其逍遙何處而毫
不關痛癢者也且十年十一年積逋未完十二年分文未
解職掌何存若不請旨議處將令士衆嗷嗷餬口無資脫
巾不免正當上緊辦賊豈堪別生決裂之虞伏祈皇上立
勅該部將王楊基從重降處仍令戴罪轉餉完日議贖斯
或儆醒疲頑之一道也

崇禎十二年十月二十日奉聖
旨知道了張伯鯨姑且不究餉
銀卽著星催接濟毋悞軍機王楊基著該部議處

大帥才能可用疏

竊臣受命督師逢人下問以將材之孰爲可用事功之若何可成則有告臣以總兵左良玉之可用用之必可成功者什人而六七也良玉先爲副將在關寧一年臣識其人而未盡其才及爲總兵勦賊數年於此功過未免相參異同間滋多口臣察其材而恐不能竟其用也昨者入山失利聞其抱病卧牀心頗憂之及臣至襄謁見與之商確軍事甚合臣心臣思其數年以來剿撫兼用權畧過人卽許州夜變之後而引兵追殺強半來歸至率衆渡河之時而趑趄不前立梟二十餘輩試觀邊腹諸將同時有能若此

者否此以臣心所知質之逢人所得不啻相符臣又思惟
皇上特遣微臣以閣學督師寵錫輔臣之印親揮御製之
章臣本書生毛錐三寸何堪辦賊必立大將一員總統諸
部聽其指麾共臣謀畫轉行調度而後以威衆則無不服
以用衆則無不調以殺賊則罔不摧以平賊則罔不效臣
之不材不敢方古裴度而行間李愬則良玉亦或庶幾臣
聞祖宗朝有平賊將軍之印藏之御府今待吾皇平賊而
用之乞賜總兵左良玉俾掛印行事仍頒給勅書一道以
責成之良玉身爲大將聽臣節制而其部下諸將臣欲挑
選精銳數十百員每員止領二三百騎以分其勢臨陣鼓

之使進則分頭而往出奇無窮有功特拔其尤俾以次授
官選材皆盡追賊將平之日而豪傑已入吾彀餘人解散
歸農其有願爲兵士者每一官領其二三百人隨實職而
去九邊之廣何地不容安插解散卽此而是是臣請勅印
以隆事權新耳目而移心志之用也應否如臣所擬伏候
聖裁定奪

崇禎十二年十月二十日奉聖旨左良玉該部覆議卽日具奏餘依議行

軍前必資羣策疏

竊臣前面奏軍前用人爲急必須羣策兼收容臣諮訪具
題已蒙聖恩俯允臣在京在途逢人訪問亦有多員然或
在街邊未可移之腹裏或在遐壤恐難遽到軍前臣皆表

敢輕舉其有在臣統率之內者業行文往調須俟其至試
可而後用之乃見在鄖襄則寥寥甚矣監軍道臣包鳳起
久病雙足扶掖難行部臣傅宗龍前過宜城強其一見爲
臣言之今臣至而病仍未愈不能謁見公堂則其曠廢可
知況穀賊蠢動前奉明旨亦在查議之列乎所當解任回
籍聽候查結者也同知新加運同萬年策雖稱監紀原未
專任一軍通判新加僉事孔貞會原監滇兵今則無所事
事臣以米糧爲急各發銀五千兩令赴承天等處買運前
來觀其能否虛實再爲酌用然見河南按臣高各衡按臣
一揭有孔貞會萬年策以撫愚理臣今不可一日容於堯

舜之世等語臣心訝之向在部中歷觀招撫奏報似無二官之名今來豫楚訪問某起降人爲二官所招亦未有據不知按臣何據而發此言且流寇數十百萬誅之不可勝誅必須剿撫兼行斯可消散其黨皇上武英面命臣愚在部奉行理臣二年之間收拾楚豫江淮十分亦有六七今除張獻忠外革里左金老徇零星三股臣責鳳安督撫及河南撫臣分兵辦之餘似已無他賊矣獨是獻忠再叛牽動八營是其處置不善收拾未完難逭皇上之責而試思邊警長驅賊氛暫斂中原江楚不受同時煽動之憂伊誰之力可將撫之一字一筆抹殺且因皇上重責理臣而遂

盡斥其所用之人盡反其所行之事乎此非通論臣愚不敢謂然但二官才具不同稍俟買糧完日臣爲甄別非晚耳至理臣部下有管餉同知楊起鰲先因貴州避難客居臣里知其爲醇謹之士但剿餉出入動數十萬而無一關防鈐蓋殊非事體卽監紀各官亦原未請關防白頭私記眞僞難分軍前奸詐之徒矯誣無所不至臣甚憂之伏祈皇上允臣所請鑄給關防六顆速賜頒發前來以便臣愚選材授任另行具題其六顆中一顆爲管理督師剿餉關防一顆爲監紀兵馬中部關防餘四顆爲前部後部左部右部使之分路監紀各專責成於以覈軍辦賊易爲力矣

其監軍道缺甚難其人臣抵襄數日所與謀畫軍機惟該道宋一鶴是賴本官才識超裕諸務到手卽行良是監軍之選而襄陽大兵所集凋耗廢弛日久百般呼應艱繁未可輕移該道則監軍一缺或於臣舊屬部曹張克儉王珵二員之中擢用一人實爲長便臣用人求助日夜望之惟皇上俯賜允行仍勅吏禮二部速覆以便及早從事可也

崇禎十二年十月二十一日奉聖旨知道了這所奏監軍道卽著張克儉前去各官關防六顆俱照本內事件作速給給包鳳起准解任回籍聽候查結該吏禮二部知道○山松曰當日先人拜命之初從旁忌者聚衆而謀曰我輩惟有拿定不許言撫四字則楊某智勇俱困不憂其不敗也故假手於高公託言孔萬以撫愚理爲之發端其意不在熊也至包鳳起以久病戀棧且穀城之變議處在先先人具題解任回籍聽候查結亦事理

之當然者而包公咆哮致怨云以隙奏以病解歸且詎
先人以仰藥歟見於南陽志中繇此推之先人之因公
賈怨燦金之口安得有公論而傳信史哉

確探賊情實陳天聽疏

該臣前具審察賊情酌定兵計一疏蓋抵襄數日與理監
鎮道諸臣約畧訪求而爲分佈防剿之槩非有探報賊情
也臣月朔到襄查從前全未遣探卽與道臣宋一鶴商之
據稱標下都司卽啓貴可用卽於初三日五鼓遣行啓貴
沿途發報擬分兩路一繇老營官至白浪花果園慶口姚
坪等處探竹山信息一繇蠟燭澗進黃花觀高寨等處探
房縣情形至初九日戌時行過紫霄官拏得副將龍在田

下賊營出來難兵王三隨據口稱曹操並整十萬等於九月二十五日在竹山來到房縣住札長旺川離縣西六十里曹操整十萬老營離縣三四十里住軍馬舖騾馬百十有餘打糧至西河黃花觀地方撥兒馬四路探我官兵等情於十一日辰時稟報到臣是臣未到襄陽之日而賊已離二竹到房縣矣臣前預飭鄖襄軍務一疏內述確查賊情一咨詰問頗詳今十一日午時准治臣王鰲永回咨到臣是治臣於九月二十二日撤兵而賊十二十五二十九等日復來房縣確矣原治臣撤兵之故實因孤而無繼窘而無糧其所以無繼者我兵新挫之後零落瘡痍驟難再

鼓而禁旅多馬少步未諳地利尤非入山所宜其所以無糧者縣襄陽至房縣四百三十里再至二竹則有七百九十里水陸阻隘人力僅通而從前原未積糧倉卒方行貿運遠地逆流刻期難至此竹山扼賊爲第一咽喉卽不進剿亦當坐困而臣未至襄陽已失此著不可追也旣失此著賊已入房則奔突路多興遠卽均荆當章保處處宜防而果處處防之一則苦於兵薄而多岐我防其要不能兼塞其岐若防其岐則必百千爲隊而兵之薄也不可言矣再則仍苦糧遠而路險興山遠安保康三路其險遠與房竹同而卽均一水之外餘皆用陸我以兵運而兵內減兵

薄處彌薄若以民運而餉外增餉雖上更難且以險遠之糧供分薄之兵於防萬萬無益而有防兵無剿兵此束手自敵之術也臣前交代兵馬一疏歷歷分明其中爲吾人者什之三爲蔡人者什之七臣鼓舞駕馭固當使蔡人卽吾人而欲逐處分兵防城塞路期期不可吾皇自有天鑒臣愚不必深言臣日夜思算上策扼賊於山難入易制曾經面奏中策扼賊於漢但不北渡猶爲可圖一容窺渡則無策矣今扼山之策已過咽喉便多岐路分兵薄防萬萬非策養銳扼剿圖之漢南不失爲中除偏撫駐荊州府楚撫駐荊門州楚將駐宜城縣臣暫駐襄陽是自北扼南古

來四戰必爭之地賊北則背水迎擊賊南則捲甲齊驅是不易之理若其窮山小邑有同村落三家急則官民上寨渠城不顧者臣實不能以吾蔡之兵代有司而守不敢不從實奏聞也臣雖在遠咫尺天顏所陳俱是實話所圖必
要穩著伏祈聖慈鑒明召閣臣兵部兵科諸臣面商如臣
言委無謬妄乞少寬督責俾臣得審詳展布施行

崇禎十二年十月二十九日奉聖旨據奏王鰲永撤兵
回卽縱賊入房殊屬失策漢南扼剿卿卽相機力行毋
令賊再散逸該部知道

楊文弱先生集卷之三十五終

曾孫

綱授爵

楊文弱先生集卷之三十六

明 武陵楊嗣昌文弱著

農秀

山梓

農峻

孤兒山松同輯

孫

農介

同較

山櫟

農彥

疏

急飭鳳安軍務疏

竊臣前汴梁申飭鳳安軍務事已經具本題知今至襄陽
思惟鳳陽安慶河南三省將士心力不齊縱賊壑鄰久成

故套復將分巡汝南道副使劉正衡特委專任監軍牌行
該道卽便嚴督鳳安河南三省將領偵探革賊向往齊集
兵力用心合剿務期掃蕩此股事關緊急軍機文到立行
監督敢有抗違延緩本閣部定行特疏叅拏斷不姑息等
因一面又移文鳳陽安慶河南三督撫各定委戰將一二
員統兵三四千專赴該監軍道督統跟尋賊踪前去剿殺
不許分別境內境外尾逐壑鄰仍要自裏餽糧再爲轉運
接濟違者將領卽以賜劍從事督撫聽候飛叅行令先將
將領兵馬數目報查於十月初八日通行去後本日申時
據總督漕運鳳陽部院朱大典內稱狡寇半年去來商固

之間不敢入廬鳳半步亦不得越賴霍而西者蓋以我兵扼防於開順壽霍境上緊控鳳廬門戶自今歲正月截剿於霍丘南界斬獲頗多從此敗遁不敢返顧是以自春徂秋江北境內早獲安堵無虞今忽報死賊革里眼等一股在於南頓集扎營逼近太和又報一股從陳州東向逼近亳州此蓋賊謀最狡紆迴道路自西而北使我兵追躡不及狡謀窺江地方在在當防除一面飛檄副將劉良佐叅將楊振宗等各統所部官兵視賊所向迎頭夾剿務保無虞又檄鳳泗總兵牟文綬狼山副總兵蔡時春整棚兵馬防護二陵及飭各該州縣操練鄉勇嚴謹城守外惟是江

北地亘兵單賊之入路多岐顧此未免遺彼伏乞本閣部軫念陵寢重地如往歲添撥一旅駐防徐宿之間則南北便於呼應庶可萬全或剿餉免其扣減則食足而兵亦足免貽脫巾之憂二陵賴以奠安矣等因准此爲照後賊多股重勢全在鄖襄本閣部星馳至此整兵呼餉以全力相持惟恐一隙之疎無兵可發徐宿前過中州訪確革左等賊數不及萬其中能戰者不過千人若劉良佐楊振宗等提兵出境與皖豫二撫之兵跟尋剿殺自可大盡本閣部業已急飭具題茲又委信陽道特任監軍力督剿辦矣此外似無餘策也剿餉卽不扣減亦非常繼之物遠減此誠

斷難淹時惟貴督撫圖之等因回復去訖至初九日中時
據副將刁明忠張琦等差人口報於本月初四日在光山
縣地方與革左等賊相遇打仗大獲全勝所有首級馬騾
等項查明另報等情此該督理太監劉元斌及前理臣熊
文燦調遣之力也臣惟此賊出沒常在河南江北兩界之
間而河南信地屬汝南巡道爲多安慶鳳陽幸此日晏然
無事合兵剿殺此股之賊萬萬難辭不然而剿餉行盡剿
兵何資且賊來但驅出境使官兵坐而食糧各該督撫清
夜捫心亦必不忍臣所以特委監軍督兵尋剿不分境內
境外專責成功爲此故也若兵至而該道不力追剿則該

道任其責若督撫不肯發兵及發之而不自裹糧不爲接濟則督撫任其責若於河南江北不追剿之盡而又驅入楚則該道與領兵之將俱任其責仍要追入楚中剿殺全完方可免罪否卽以軍法隨之蓋楚方以全力辦鄭襄之寇兼拱衛陵藩勢不能分精神於此零賊也臣愚一面調度仍一面具題伏祈聖裁嚴飭施行

崇禎十二年十月三十日奉聖旨是這所奏鳳翔等處各賊各該督撫道將力圖殲除如再驅逐淹時不速剿滅俱以軍法重治仍著該部嚴飭施行

天心示儆臣當辜疏

臣接邸報崇禎十二年十月初四日欽奉上傳據所司奏

彗星垂象朕心儆惕靡寧謹於初四日爲始青衣減膳撤樂修省以星隱爲止典禮照常因思政事或多過失著諸臣直言無隱各再猛省盡職各圖消彌其今歲行刑暫免各省直一體遵行該衙門知道欽此至本月十五日又奉上傳彗星雖隱旬日昨又雷震非時朕與諸臣當益加儆惕不可刻懈以圖消彌東西倣報頻聞內外文武俱宜各奮智力大創狂氛服色等項姑於十五日照常該衙門知道欽此臣惟機槍出見志在除氛洊震非時象兼驚遠我皇上德音一布戾氣旋消凡在臣工敢忘祗懼而況臣至不材蒙恩異等倏內倏外官遞走於十年匪武匪文責兼

備乎兩事一不稱任萬有餘辜夫豈待因變而後陳言又寧敢絜身而圖引去惟祈聖斷投鼻遐荒甘禦魑魅以餘生庶塞魯殃於此日此臣撫躬自責薰沐再三而後敢請命者也

崇禎十二年十一月初三日奉聖旨卿忠誠慷慨力任師中異見星蓄著益輝壯猷建國底定副朕注望不必引陳該部知道

乞辭恩賚俯察愚心疏

崇禎十二年十月二十九日准吏部咨爲欽奉敕諭事本年十月十四日該司理監傳出敕諭敕吏部邊警內地城守戒嚴內閣輔臣帽幄運籌宜特加恩賚首輔國觀加少

保太子太保改吏部尚書進武英殿大學士廕一子
做中書舍人仍賞銀五十兩紵絲二表裏次輔副呂賞銀
四十兩紵絲二表裏國用復粹加少保兼太子太保改吏
部尚書進武英殿大學士各廕一子入監讀書仍各賞銀
四十兩紵絲二表裏明恭四知加太子少保改戶部尚書
進文淵閣大學士各廕一子入監讀書仍各賞銀四十兩
紵絲二表裏俱照新銜給與應得誥命舊輔國祥逢年各
賞銀三十兩紵絲一表裏如敕奉行欽此欽遵備咨到臣
臣恭設香案行五拜三叩頭禮訖伏念烽犯內地城守戒
嚴此聖主焦勞之時非臣子徼功之地而况臣典中樞不

能禦侮於藩籬之外致厯主憂於堂奧之內此是何等罪
戾幸逃斧鉞已屬寬典又敢徼恩賞乎臣頃接邸報彗星
偶見雷電非時煌煌諭旨各省愆尤同官引咎交章臣更
首宜黜譴方具另疏請罪茲若復蒙恩賚則是頑鈍居心
毫無愧怍清夜捫心必不可容於人世矣用敢陳乞聖恩
收還成命併畱銀幣以待有功俾臣努力行間別圖自効
免于萌面喪心之恥則天高地厚所全於微臣者大矣

崇禎十二年十一月初三日奉聖旨卿運籌中樞城守
敘賚原屬典著即遵旨祇受不必遜辭該部知道

恭報調到兵馬犒賚日期仰祈聖鑒疏

臣以十月朔日馳至襄陽其時在襄陽者惟總兵左良玉

之兵署總兵孫應元之兵叅將馬得功潘大節之兵與舊
理臣標下汪雲鳳等步兵二千有奇馬兵一百二十而已
臣念均州重地首當賊衝卽催左良玉三日啟行以攜來
詐城賞功借作月餉而遂無一金以犒將士心歉然不安
繼與襄陽道宋一鶴議犒在襄之兵必須那借銀兩該道
請問則例臣謂不犒則已犒則須成體面蓋倣京邊例行
而臣初至師中實不可不通行一次非多事也於是乃定
署總兵官折花幣銀十兩副將八兩叅將都司六兩守備
四兩中軍千總折花絹銀二兩把總一兩紅旗百總折牛
酒銀三錢管隊二錢兵下一錢以後犒例皆然始於初八

日調副將張一龍之兵自新野縣至與署總兵孫應元叅將馬成功潘立節等官兵共犒銀五百九十八兩又於十二日調副將周遇吉之兵自新野縣至而臣原帶出京鄭良棟之兵亦於是日至與同理標汪雲鳳田祿道標劉喜才等官兵共犒銀四百三十七兩九錢又於二十四日調到署總兵黃得功之兵自光化縣至又調遊擊羅泰都司梁虎立功副將王允成加銜叅將李萬慶中軍齊養氣等之兵俱自河南剿猺革兵至共犒銀一千二百八十六兩三錢又於二十八日調到副將張琦刁明忠叅將竇國選李時華艾繼宗等之兵共自河南剿猺革兵至共犒銀六百

三十四兩而總兵左良玉陳洪範及副將周繼先等各兵之在信地者臣未得親往須專官往犒不在前數之中其犒過官兵如孫應元馬得功發往荊州府鞏護惠藩重地當賊南下之衝潘立節發守穀城之鍾家灘斷賊北窺之路王允成李萬慶齊養氣發之穀城縣與總兵左良玉合營養氣乃劉國能中軍因國能病瘳未愈故將其兵以來也才明忠羅泰發之南漳仍今襄陽道親往佈置而臣標汪雲鳳禁兵喬仲春亦各先領火器步兵助南漳城守其梁虎之兵發回河南撫標協守光化之羊皮灘等處鄭良棟帶兵五百散歸禁旅各營見在襄陽惟有署總兵黃得

功副將張一龍周遇吉暫駐江北副將張琦叅將竇國寧
李時華艾繼宗暫駐江南以爲聞警星馳截殺之資今十
一月朔督理監臣劉元斌又率張一龍等親查鍾家灘羊
皮灘一帶再行佈置去矣其田祿劉喜才馬兵共計不滿
二百亦迭遣哨探無一空閑臣愚請祈聖鑒以兵之相去
原有遠近調到襄陽各有先後今之佈置畧有分合奇正
寓於其間待機關一動首動尾應或有可圖無敢差誤是
則可知而不可言者也副將刁明忠臣先令縣承天赴荆
門乃徑縣隨東赴襄陽臣犒賞旣畢數其違今之罪綁下
欲斬據襄陽道稟稱戰將可惜尚堪饒死立功臣取合營

公保明忠立死罪軍今狀發往南漳蓋南漳宿兵議賊之後賊自不敢馳突荆門而南漳與穀城互相觴角即欲北走窺灘亦次且而不敢肆此又臣之微意也臣到襄一月調兵遣將雖無敢時刻怠淪而懼無以仰稱聖意不禁憂心焚灼敢因犒賚事畢並奏次第以聞

崇禎十二年十一月初三日奉聖旨覽卿奏調到兵馬分合佈置知道了通著各該將領倍加鼓勵亟力合殲刻期蕩寇如有違誤坐失機宜的將軍法從事務蚤奏功該部知道

申明交代錢糧直陳短少玩誤之實疏

竊臣前至軍中具有交代錢糧一疏內據理臣熊文燦冊開實在項下有十年分未解對剿餉一萬三百九十三兩

十一年分未解到剿餉二十四萬一千七百二十兩有奇
十二年分全未解到剿餉三十五萬一千兩是三年剿餉
共存六十萬三千一百一十三兩臣尚未查詳細不知不
解之責在督餉侍郎抑或在省值道府但知分司王揚基
原係轉餉於楚者不揣逍遙何處且十年十一年積逋未
完十二年分文未解職掌何存特祈皇上立敕該部將王
揚基從重議處仍令戴罪轉餉完日議贖等因於十月初
五日拜發候旨間節准戶部咨文爲禁旅需餉甚急等事
內開十二年理餉該四十六萬六千兩比前數多十一萬
五十兩不知何據云然再准督餉侍郎張伯鯨揭爲謹遵

均溢半畱之旨等事內派理院項下十二年分止銀三十萬兩較前數少五萬一千兩較部咨則少十六萬六千兩矣揭內又稱浙江一省寧國一府之均溢銀兩皆以山塘湖蕩爲詞在十一年分釐未解共計九萬九千五百餘兩舊派理院項下今仍復派之亦是有名無實云云則是十二年理餉實止二十萬兩有奇而理臣前算三年共存六十萬三千一百一十三兩者除却五萬一千又除九萬九千五百餘兩止有四十五萬二千餘兩矣及查該督移明節年剿餉完欠銀數一咨內開十年分未完銀一萬三百九十二兩四錢零該理臣取過河南府事例銀七千三百

三十二兩六錢四分三釐折扣外實未完銀三千五十九兩七錢七分三釐零又開十一年分浙江欠四萬四千零寧國府欠一萬七千九百零皆以山塘湖蕩請蠲爲詞廣東省欠一萬六千四百零以十年差官柳文應解河南布政司一萬四十兩已經王理院取用至今駁催未經認明江西欠四萬零池州府欠二千一百零太平府欠二千五百零廬鳳淮揚徐滁和七府州裁站三萬兩先准兵部咨文原無細額不報不解難以責備鹽課銀三萬一千九百兩因內部撥去冬兵鹽菜一萬六千兩並那撥楚撫接濟總在事例內通融奏補等因是則浙江寧國廣東之欠數

廬鳳淮揚徐滁和之節裁亦皆有名無實應除十萬八千三百餘兩並十年分之事例七千三百三十二兩零而前算三年實存四十五萬二千餘兩者再除十一萬五千六百兩零止有三十三萬六千餘兩矣其中仍有鹽課一宗三萬餘兩通融湊補尚無確數則合三年之所存僅當今十三年之所派而舊欠與新徵尚不知其何時應手甚矣理餉之奇窮而督餉之失職也臣愚未出都門早憂此事幸題部撥五十萬兩奉有欽依乃部撥內湖廣該銀八萬三千五百餘兩該布政司以解過禁旅行鹽四萬五千兩買米五千兩係借動新餉求就撥抵還則是五十萬中臣

未至而已用其五萬矣今節准部咨禁旅之餉楚撫鄖撫之兵之餉無不於理餉通融而此一理餉也合舊逋新派與部撥之數通計僅得七十五萬金以供臣所督左陳等鎮及節收撫衆與禁旅行鹽通融支給不過半年之用猶恐有名無實不報不解難以責備者未免如餉臣所云而楚撫鄖撫無不通融於此則將取之何處乎噫臣於是而歎前叅王事王揚基猶有未盡也揚基轉餉於楚實奉駐省酌濟兵到餉隨之明旨而忽若忘之謂江西是其專責餘虧風馬牛不相及見臣而駭始踉蹌而走大可異也外此則有員外李爲珩也爲珩雖不駐楚實奉贊理應天等

處剿餉之敕書而恬不經意十一年分拖欠二十四萬爲
所管便是二十萬之多尤可異也夫剿餉責成各道而
各道逋欠曾否特叅分管責成司官而司官玩違是誰督
率且浙江寧國之均溢人以爲有名無實而仍派理餉是
明誤理餉以虧額也矧總此二項而咨開十一年分未完
六萬一千九百有奇揭開十一年分文不解九萬九千五
百餘兩是何矛盾廬鳳等府之節裁故以爲部無細額而
任不報解是故豈理餉於罔聞也矧部無細額而鳳陽督
撫豈無細額若撥之該督自行催取而另補理餉豈不咸
宜諸如此類臣不能爲侍郎張伯鯨解也更可訝者十二

年分半徵剿餉奉旨已久該督題請全徵部覆斯在後耳而今分派督撫猶是半徵之數何以託之部文九月始到十月始爲奉行十二年分總理派餉止於三十萬兩臣查交代兵馬共計二萬四千有奇較之秦督提兵僅僅三千內外何以亦派三十萬兩有奇名實大相懸遠至於楚撫項下原有陵兵五千撫兵一萬五千每月共用餉銀二萬七千五百二十五兩姑以十個月計該銀二十七萬五千餘兩而今止派十五萬兩餘則望之通融尚該十二萬五千餘兩也鄖撫項下先報整兵六千續報新舊兵馬共計一萬七百有零每月約支餉銀一萬三千三百九十五兩

姑以十個月計該銀一十三萬三千九百餘兩而今止派八萬兩則望之通融尚該五萬二千九百兩也此猶姑計十個月亦姑據紙上派數查酌當然倘其中有如餉臣之揭有名無實難以責備者抑如楚藩司之詳未經派發先已那用者不更虛懸之甚乎而臣原建通融之議戶部屢受申通融之請迄將何以應之也總之臣責督兵不暇理餉督餉侍郎移駐楚地就近催支計臣所督前任理臣已報交代之兵及新奉旨收用王國寧之兵與臣續調遼兵合之京營勇衛大同之兵一月約須餉銀十萬餘兩方可足用而楚撫之月支二萬七千餘兩鄂撫之月支一萬三千

餘合之前數共爲一十五萬兩督臣至而支領者就近支
領通融者就近通融總聽督臣爲政使臣不分心於憂餉
得專力於治兵殫精於辦賊是則臣所千萬懇祈於皇上
者也抑臣猶有說焉今剿賊之餉萬倍艱難而剿賊之手
十分叢雜有名爲一兵而實不堪用者如鄖撫之兵臣見
秦啟謝巖二枝人僅骨立衣甲全無鎗執空筒藥彈殊少
據啟稟稱缺餉五個月致然他兵尤不堪於啟則何可虛
糜剿餉也此鄖撫之兵亟宜精選而繕備衣器爲尤亟也
楚撫之兵臣未面見查其額餉有辰兵一枝歲食司府餉
銀九千一百八十兩而不算剿兵又有武黃等府屯租一

萬八千九百餘兩而不算剿餉當此艱難之際地方兵力
餉力當全用爲剿賊之資何可又生分別而舍見在他求
爲也至於護陵之兵以五千計月支餉銀七千三百八十
五兩此在戶部必須設處專供爲可長繼之道勿以通融
剿餉爲辭剿餉有時而盡陵兵無時可休此一宗得有歸
著尤是萬年根本之計臣不敢不迫切請命也原係軍前
用餉文字冗長未能刪削伏祈聖鑒矜原敕下戶部將短
少玩誤實情覆請裁處必總將剿餉全付督臣守催實到
軍前臨期酌量通用免其一半解部亦勿懸定瓜分則軍
儲可裕缺乏無虞矣

崇禎十二年十一月初三日奉聖旨制劄係軍前急需
何得短少玩張伯鯨著再降職一級工楊基李爲珩
俱著革職充爲事官照舊司撫張伯鯨即移近嚴督
各領司作速招數全催實川務副支用如再違玩致誤
軍機必重罪不宥即兵部不據該撫所司何事著即
精選摺備毋令虛糜辰兵屯租及護陵兵餉該部看議
速奏○山松曰讀此當日短少遲誤張公身在事中實
難辭責非先入之有心求多也以此開罪於張公豈有
之此外從不聞張公有前籌之借而黃岡吐瀉爲之作
傳乃云先人之苛繞正曲細已甚又不能諒公畫蓋爲
公報彈章之恨也

賊勢南趨斷剿宜急疏

該臣於十月十五日行文調度各撫鎮云炤得本閣部初
至襄陽具有審察賊情酌定兵計一事咨行督撫鎮道分
佈防剿機宜於十月初四等日行文去訖隨遣偵探得知

賊情又有確探賊情竇陳天聽一事於十月十三日具題
亦經行知去訖今十四日續接探報賊繇房縣起營分走
遠安南漳二路南趨荊州審矣荊州一面阻水一面阻山
夔門出兵以扼其前鄖襄鼓銳以蹙其後賊雖甚狡不死
何之但所慮者苗頭雖南轉折可北山徑雖險取捷而回
我兵必從平川大道往來逐之則無及矣爲今之計陸必
斷山谷水必斷灘舟使賊出山不能入山奔水不能越水
則成擒可決大功可收斷山當屬鄖撫斷水當屬豫撫其
形勢然也鄖力不能斷山必會合秦力調興安商雒二道
各督陝兵一枝赴鄖撫標下扼險搜山如賊盡出山則以

兵塞蔣口方家堰二隘使必無入谷之途豫地不能斷水
必進就近楚地防穀城光化諸灘以上連槐樹關查該省
歲歲防河用冬春五六箇月道將之力兵糧之費今移而
用之防漢卽黃河未有虞也其本閣部標下馬步原無多
兵必調各鎮將領精兵與督理勇衛京兵馳電發雲合
景從斯可萬全操勝而偏撫守荊州務嚴保障蜀撫出夔
州務折枉鋒楚撫控荊門務裕芻粟其大綱領如此已見
前咨稿案今茲再一引伸惟我督撫鎖鑰道殫力同心辦此
一事誓不再舉斯本閣部之所殷勤託重不厭諄切再三
者也一二節目未盡附開於後卽使詳細通查應值任者

直任應轉行者轉行勿緩勿漏勿悞軍機 計開 一鄖撫有兵六千見任鄖均扼守如賊出山已盡則以蔣口方家堰爲塞賊要衝本閣部標下周繼先等步兵與總兵陳洪範之步兵相助扼守 一陝督兵在興安調興安道監督一枝繇竹谿入鄖聽令搜剿 一陝撫兵在商雒調商雒道監督一枝繇上津入鄖聽令搜剿此二道原屬鄖撫節制不許玩違 一豫撫督兵扼守槐樹關羊皮灘鍾家灘等處其南陽道協同信守炤磁州等道帶領兵馬防河例行不許玩誤 一豫鎮標下潞陽宣威兩營調赴本閣部標下合剿仍調汝州道監督其軍以資籌畫不許遲誤

一楚撫帑前咨前題各款事理控扼荆門仍督借南糧
買備草料爲荊州荆門宜城大兵合剿之用 一偏撫帑
前咨前題各款事理駐扼荊州府防護惠藩並收斂船隻
阻賊南渡之謀 一楚鎮錢中選發兵聲援荆門仍斷豐
樂河窺渡之路 一署荆南道馮上賓嚴守彝陵要害扼
斷西窺 一川撫仍帑前款提兵五千急出夔門水陸奔
會荊州府合剿 一左鎮兵下穀城聽本閣部調度馳擊
一陳鎮除步兵外其馬兵馳下穀城聽本閣部軍令合
營大剿 一勇衛京營之兵除守均州外其餉聽督理會
同本閣部臨機調度截殺等因除行文外理合具本題知

崇禎十二年十一月初六日奉聖旨一切調度方畧知道丁卿還嚴勸力行以奏成功該部知道

稟承上緊夾剿明旨直陳迂緩悞事實情疏

竊惟皇上命臣督師揀民水火恨不一日而去其疾也臣祇承面命倍道星馳亦恨不一日而去其疾也乃出都之日同官之勸勉樞曹之責望皆恨不一日而勾當此事者乃山川遼遠期會不齊習性舒遲疾呼不應臣束手窘步每欲激切上聞而未遑縷指今十月十六日准兵部咨覆鄖陽撫臣王鰲永塘報事奉聖旨竹谿復陷該督撫鎮剿禦何在深可痛恨王鰲永姑著再降二級仍戴罪殺賊自贖督師輔臣金劉元斌星督各撫鎮上緊夾剿秦督撫俱

著亟力堵禦毋使流毒失事情形該巡按御史確查馳奏
卽馬上飛飭行欽此臣伏讀未畢如火燒心不得不直陳
其狀謹逐一計開於左惟聖明垂察焉 計開 一督餉
侍郎張伯鯨臣於九月初三日在京具奏移鎮楚豫初四
日戶部覆奉欽依十一日臣在定州差王仲官催去一次
到襄又差催數次至今尙無一信相聞 一陝西總督鄭
榮儉巡撫丁啓睿臣於九月初八日在定興差王時明前
去知會後在汴在襄復差王正學等前去數次至今尙無
一信相聞途次曾接塘報一件乃上京之報非臣調度之
文也 一安慶巡撫鄭二陽臣於九月十一日差王仲官

在定州前去知會後在汴在襄又差數次至今尙無一信
相聞 一鳳陽總督朱大典臣於九月二十一日在汴差
韓生榮等前去知會至今未回該督有塘報到襄相聞一
次尙非臣調度之文 一四川巡撫邵捷春臣於九月二
十一日在汴差王化民後在襄復差沈一亨前去催調至
今未回該撫已到夔州有公文到襄相聞一次亦尙非臣
調度之文也 一河南巡撫李仙風臣於九月二十二日
在汴面會一次其兵合併鎮兵該有一萬五千臣責該撫
嚴堵鄖襄漢江一帶關口饒灘惟調潞陽宣威兩營馬步
二千赴臣合剿今尙未到 一湖廣巡撫方孔炤臣於十

月初一等日襄陽面會數次其兵一萬五千先以三枝扼
控荆當宜城續調陳治一枝臣令發去荆沙合防惠藩重
地尚未報到 一鄖陽巡撫王鰲永臣於十月十二等日
襄陽面會數次據稱其兵六千臣以總兵陳洪範副將周
繼先之兵益之任堵均州四路之衝其穀城之石花街一
路堵賊之出保康蔣口南漳方家堰二路堵賊出而復入
不能全任臣調陝兵二枝益之方去未到 一偏院巡撫
陳睿謨臣未面會止文移往來有兵四千臣令堅壁荆沙
鞏護惠藩毋得輕動再以楚兵川兵益之未據報到復馳
禁兵一枝往助之矣 一總兵錢中選有兵五千護守皇

陵未敢輕動止是賊趨荆門距承天止隔一水當量發聲援仍嚴堵豐樂河北窺之路 一總兵左良玉有兵三千見在聽臣調度其所部劉國龍李萬慶等有兵六千餘俱發遠剿革左臣於九月二十八日在南陽差役調去至今未回 一總兵陳洪範南兵二千防守鄖難已久內馬兵數百臣行調來會剿今尚未到 一勇衛京營兵共一萬一千除孫應元發往荊州張一龍近駐均州黃得功周遇吉俱駐光化併見在襄陽火攻二千聽臣與監臣調度外其張琦李時華賓國寧文繼宗併火攻一千俱剿革左臣亦於九月二十八日南陽差役調去至今未到 一大同

副將刁明忠有兵二千發剿革左臣亦同前調去未回據稟繇信陽隨州而來臣今就便前往荆門合楚撫營兵扼剿亦未報到一臣標下步兵有周繼先王祿等共領一千二百餘名駐防即灘已久臣新遣郎起貴領兵四百哨房縣竹山一路戴顯祖領兵六百哨南漳保康二路又發火器手三百同鄭襄兵一千協守南漳今在襄陽僅汪雲鳳領一千二百餘名隨臣進止外馬兵一百二十人而已以上各該督撫鎮將有知會數次杳無音信者有覲面相商止堪防守者有違剿諸賊急調未回者有零分哨防欲用難撤者臣開列如右祈我皇上留神一覽便知臣愚

心急如火眼望欲穿而無奈此道之長習性之慢不能不墮迂緩誤事之坑谷也至於各處塘報情形惘然鄖陽最近賊者尤爲最甚臣遣哨稍確相機調度日有不同不能盡瀆天聽然其大槩決當上聞所有另疏題知賊勢南趨一事是臣十月十五日之調度也統祈聖鑒施行

崇禎十二年十一月初七日奉聖旨剿賊機宜刻不容緩據奏該督撫調度不應平賊何日鄭二陽朱大典李仙鳳方孔炤陳洪範俱著降二級鄭崇儉丁啟睿邵捷春等各降一級王鰲永再降一級張伯鯨駱駝稽遲有誤軍餉著降一級俱著戴罪圖功自贖以後撤調分合不應者卽遵敕剿應參飛參應處卽處務要軍法大行蕩平速奏不可徇縱延緩該部馬上馳諭

慶賀疏

崇禎十二年十一月二十八日恭遇長至令節臣嗣昌稽
首頓首上言竊以天地之大德曰生日至泰一陽之復聖
人之大寶曰位履長凝萬國之休惟吾皇御極歷十二年
法天道乾行周四五紀純坤剝盡品物流形夜半曆元中
和懋建此固將使河山九點鏡靜煙消玉帛萬方角稽辨
解豈長煩我至尊憂社稷抑亦興歌猛士守四方已哉臣
嗣昌思銜楚節咫尺遺顏夢繞嵩呼徘徊顧影梔銀河而
洗兵甲才愧鷹揚依北斗以望京華神飛虎拜謹焚香望
闕百千萬叩頭祝吾皇萬萬壽臣可勝歡忭舞蹈之至

崇禎十二年十一月初七日奉聖旨覽卿奏賀朕知道
戶部知道

新撫誓不附逆疏

崇禎十二年十月二十六日准兵部咨該本部尙書傅宗龍等覆總理熊文燦具題前事內稱王國寧應炤劉國能李萬慶等例劄授虛銜隨征殺賊著伍兵六百名應食剿餉家屬三百餘人隨在安插俱聽督師輔臣便宜從事等因奉聖旨王國寧既投誠歸順許炤例授劄隨征殺賊兵著伍食餉併家屬與解散的通著督師便宜安插行欽此欽遵備咨到臣該臣擬行文安插間適總兵左良玉自均州奉調移營穀城王國寧與其撫衆攜帶家口盡隨該鎮前來聽令臣卽於是日傳至襄陽教場約會督理太監劉

元斌暨鎮臣左良王道臣宋一鶴同點驗隊伍人馬宣示
主上恩威諭以進忠報効仍各加犒資隨於教場內出示
曉諭前事內稱本閣部覆奉旨緣縣爲帑賞資各營官兵
本閣部行有通例乃在伍食糧隨征已久者花幣牛酒俱
各折銀以從其便也今王國寧等奉旨新收入伍銀幣牛
酒理合從優以後如有投誠歸順之民卽當帑此爲例其
安插家屬著襄陽道酌查無礙地方權宜寄寓然王國寧
等既隨征殺賊家屬帑管不可無人著令每十家編成一
甲立一甲長每十甲編成一保立一保長其甲長保長俱
報姓名在道仍立一總管保甲之人凡家屬有事告知甲

長甲長告知保長保長告知總管來稟襄陽道如奉襄陽
道傳令止傳總管以遞傳保長甲長每朔望及逢五逢十
總管赴道打卯稟事以爲常蓋家屬旣爲良民編立保甲
與吾民一體特置總管以宣令達情庶隨征者一意効忠
無復內顧之慮其不係家屬願散回鄉者赴道請給印照
許從其便此本閤部遵旨便宜安插之法也所有賞資則
例一併開列合示通知加銜遊擊一員王國寧銀十兩蟒
段一疋督陣都司一員吳學禮銀六兩綵段一疋中軍守
備一員宋福祿銀三兩綵段一疋千總二員姚宗美劉廣
譽各銀三兩各綵段一疋把總二員郝慶高山各銀二兩

各綵段一疋督陣守備六員傳汝松等各銀二兩各綵段一疋前標紅旗二名譚選等百總五名張承禹等及兵丁六百二十員名馬騾七百二十八匹頭實有未盡之數在其家屬三百一十八家之中既經臣等驗過其間精銳尙堪著伍續該總兵左良玉呈報實在官兵八百九十一員名戰馬四百五十四匹馱騾三百五十一頭等因臣行一體造支發營合剿去訖而其家屬暫安於樊城迤北長豐洲地面該襄陽道行據通判徐志進查據鄉約王可賓黃欽張國卿等連名結稱十一月初二日王國寧同有馬兵俱止穀城家屬俱住頭甲二甲地方一應食物平買平賣軍

民相安又據總督萬養志造有保長甲長花名清冊各等因在卷是此一宗撫衆便宜安插暫已得所臣前則因理監諸臣之成事以善其始後則仗鎮道諸臣之協心以善其終而治臣王鰲永先亦收之標下徐聽付之鎮臣監臣劉元斌與臣同賞於武場復更加給之花幣皆於剿撫之全局默有駕馭之深心臣雖碌碌或可幸不謬斯舉也

崇禎十二年十一月十一日奉聖旨朕知道了該部知道

軍中用間多方疏

臣惟鄖襄賊股勾合渠從數不下十餘萬依阻深山兵糧難入必多遣間諜解散餘黨使其勢孤心怯然後剿殺可

行臣抵襄月餘與撫監鎮道備商此事有微密遣行者有明白宣露者多方雜出致賊恟疑一時甫見其端稍久必收其効至於給散小票招掠難民臣欲以陣斬賊級每顆二兩之賞給之使其唱此風聲轟然遠播將難民不招而自出賞懸不用而自行矣但遣同之內尙有承前行撫之人用之能入賊營臣恐別滋謫議謹述陳一二以祈聖鑒倘所行不甚乖謬乞俯賜批答俾臣遵守施行計開

一臣將段帛裁成方幅約寬四寸長五寸許上書欽命督帥閣部密令用印鈴蓋令云本閣部奉朝廷面命只要活拏張獻忠一人其餘盡赦不問爾等能綁獻忠來降者朝

廷賞以錦衣世職玉帶高官獻忠妻妾財物盡給克賞付
此欽頒印鈐帛書爲帛等因將賞功銀給襄陽道宋一
三百兩總兵左良玉五百兩工部副將楊世恩五十兩
其餘死士投入賊

思逃生命但恐

小票出有十門
印小票烟我道
難臨民故破賊
人引誘而去却
意多給小票仍
人出來親見公
銀：兩百領上
仍與印名回
印並立收
萬歲分從

名堯典咆哮虎等聞印票已到賊營紛紛傳說欲逃出者甚衆一臣行哨探都司郎起貴等密遣官兵扮作逃難窮民暗帶火鏹火石潛近賊營放火已又通行撫鎮追將爲大舉燒荒以絕賊望事照得賊竄深山打糧四出勢將臨乏突走堪虞本閣部確探情形其步行脅從皆願逃生已另有招散之法惟有馬精賊不肯離羣較爲難制細思隆冬時月草木萎黃倣行邊塞燒荒之法太遣官兵裹糧數日將山中草木凡可飼馬者乘風縱火燒盡無遺賊之馬驟自將困斃餘精賊安之乎夫賊所未至燒之必不能來賊所已過燒之必勿使返此不用操戈對壘而絕賊突逞

之望矣如大兵不能羣行卽扮作難民暗行縱火或傳知山寨居民自行發火賊望火必不敢近入火一無所資馬賊困倒步賊自散此又相因之道也爲此咨劄前去卽便速遣官兵多方縱火務要偏地延燒野草木葉淨盡無遺毋容一處疎漏仍將遣過官兵日期燒過地方幾處詳確速報以憑具題違玩者飛叅勿忽 一臣准郎撫王愷永咨解立功副將賈一選獲賊三名關索等審係整十萬下逃丁故將二名給賞銀牌放去羈禁其一大張告示曉諭爲審明賊細昭示三軍事本月十七日據副將賈一選報獲賊人三名經襄陽道解本閣部面審一次不吐實情今

十八日再提單審堂上不畱一人乃敢吐實云我三人俱係整十萬差來投降者小的關索真名石萬陽慶陽府環縣人在寧州入夥一向是老本精賊今整十萬情愿投降是實差我三人出來要討示下回話去本關部問他要投降以何爲據關索應云隨老爺分付要他甚麼憑據就是本關部說我叫他殺了張獻忠就是憑據若活綁將來朝廷賞他錦衣世職玉帶高官不是小可關索搖頭云他沒這個本事小的不敢去說本關部說既沒這本事不必講投降了綁下去殺了罷關索號哭討饒久之本關部言既不能殺張獻忠還有甚麼做得憑據的你尋思來關索

低頭久之云有了有了那張獻忠的軍師是老八隊潘柅公兩個這兩個我家掌盤子殺得來本閣部命諭這兩個雖是有罪還算不得張獻忠也罷也罷與我活綁將來再作道理關索叩頭求去回話本閣部大笑曰你這一時謊話就要哄脫身去好大膽奸細我豈不知敢來哄我關索叩頭哭說千真萬真不敢一字說誑本閣部終是不信再四思量把你畱下當著放那兩個回去限定二十日成了功來如差一個時辰將你千刀萬剮你甘心否關索叩頭說情愿如此姑且如此施行噫本閣部奉朝廷面命直前真撫不要將官打活仗安官騙賊錢今寧以人口稱投降

如此那裏委實信得他過猶恐胡傳浪播懈我三軍之心
特將一問一答言辭畱著一個放他兩個緣故大張告示
曉諭通知我三軍同心努力奮勇向前殺敗賊陣生擒張
獻忠來朝廷大陞大賞玉帶錦衣是我三軍手掌中物勿
因財細而懈心也 一臣訪得鄧州舉人丁之棟有堂妹
爲張獻忠寵妾前此曾入賊營臣行南陽道密舉准巡撫
咨解其父子二人家僕二人監禁襄陽府故令之棟寫書
與張獻忠教誘殺其黨與將功贖罪再討招安令家僕二
人持去其妹有母尙存亦令鄧州羈管以其全家爲質
一臣訪得方外姚宗中號冷水道人與曹操過天星等熟

識臣令襄陽道送入左營遣哨丁伴送前去曹過二營遊
說勿與獻忠合股宗中請討憑據臣與一密令云近據哨
探報來惠登相在竹山時卽與張獻忠分股羅汝才回房
縣後亦與張獻忠分股不肯同行諒因前撫之餘順逆有
別本閣部奉聖上面諭以揀民水火爲心但揀得一人不
罹兵刀之厄者卽是仰慰聖上之心不負特遣本閣部前
來之意也姚道竚起該鎮議事可與商之從前安官到賊
營中騙錢皇上聞之痛恨諭本閣部不得再遣故與方外
道人圖之必不作騙錢勾當耳此令 一臣聞王國寧受
撫通判邵起之力爲多欲因國寧以招曹過而孤張賊之

黨起願行之差李文奔去不遇曹過而遇張成帶回張大經史大勲及張獻忠與起之書見在獻忠書末果要招安也在上司如要征剿也在上司全仗台臺鼎力幹旋回天挽日雖無大驚驚之語而罪在不赦無復可言惟有間開曹過尙是一著仍囑邵起圖之不可廢也 一臣據總兵左良玉解擒打糧西賊梟示一人標將汪雲鳳解擒打細奸賊梟示一人又擒打糧小子內有許州夜變者發左良玉梟斬一人外其餘或給賞票回鄉或發原營收伍或暫畱標下養而用之臣因審知某人係某老管隊下某人係某小管隊下假爲密諭暗號令哨探官丁今有西營差出

投降之人甚多還要差他進去他說怕認得他剝手割鼻
今發去暗號數十件汝可選差精細人進去要遞與後開
投降之人方得實用千萬不要錯投與別人悞了大事汝
小心在意千萬千萬特諭計開一條龍差出某某一盞燈
差出某某元金龍差出某某一翅飛孟良差出某某其暗
號用白綾三寸書上山山頂擒拏過水水底擒拏等字印
鈐發去又爲大書告示張貼所過神廟示諭西營投順老
小管隊人等據汝密稟事宜本閣部一一知悉只待廝殺
之時汝等一齊動手生擒活獻方顯功勞大陞大賞卽奏
朝廷斷不虛示等因去訖臣聞賊性善疑以此疑之又聞

不毀神廟所過輒行修理故令貼之廟中先臣王守仁言
得他一疑吾事濟矣此臣用間之意未敢必其有濟第欲
得其自疑疑則黨可攜而渠可縛喫紫猶在揀出難民四
散奔走則一朝潰決之有時而萬命生全之可保臣仰體
皇仁拯民水火之至意也臣雖駑鈍無似不敢不嘔寸心
伏惟聖慈再加指示施行

崇禎十二年十一月十二日奉聖旨覽奏行間機宜卿
便宜酌行不必別慮滋謫該部知道

楊文弱先生集卷之三十六終

曾孫

紉授倅